

Segun Minister di Finanzas Mike de Meza na apertura di Watertoren San Nicola

Pariba di brug tin proyectonan cu ta cuminsa for di Esso Ville te cu Pos Chikito



Minister di Finanzas Mike de Meza.



ORANJESTAD — Un di tur e miembro di Gabinete Mike Eman cu ta sinti su mes hopi orguyoso di e proyecto di restauracion y renobacion di Watertoren na San Nicolas, ta Minister di Finanzas Mike de Meza. E mandatario, como digno representante di e distrito,

a dirigi su mes na e publico na Ingles y a expresa su sentimentonan di orguyo, pasobra ta un tras di otro e proyectonan den e distrito ta biniendo cla. Adicionalmente tabata un satisfaccion pa por anuncia cu e sede di Watertoren a keda destina como un

museo industrial caminda e companianan di utilidad local ta bay exhibi nan historia na residente y turistanan. De Meza tambe ta carga e cartera di energia bou di cual e companianan di utilidad manera WEB, ELMAR y SETAR ta resorta.

Den su discurso durante e ceremonia di apertura, Minister de Meza a duna su palabra di pabien na tur e socionan di e proyecto, for di su colega di Infraestructura Benny Sevinger y su departamentonan te na Monumentenfonds y e contratistanan cu a ehecuta e proyecto. Como Minister di Energia, responsabel pa e companianan di

utilidad, Minister Mike de Meza a felicita nan tur pa e cooperacion cu tabata tin entre e entidadnan aki den e realisacion di e proyecto aki y su futuro uzo como un museo.

E mandatario a sigui expresa cu e ta corda con tempo e tabata chikito, e edificio monumental aki semper a cautiva su atencion y imaginacion. Esaki ta recuerdonan cu ta keda graba den su memoria. E ta kere cu esaki tambe lo sosode pa hopi otro hende di San Nicolas. “Tabata hopi doloroso pa wak durante ultimo añanan con e watertoren a bay atras,” e ta expresa. P’esey mes e ekipo di trabou aki a bisa cu “ora nos drenta gobierno nos ta bay drech’e y esey nos a haci,” e Minister a bisa.

Otro ehempel di promesa cumpli ta e post bieu di ambulans cu pronto ta bay habri como un centro caminda e pueblo di San Nicolas por topa cu e Ministernan. “Apesar di e crisis, nos a bisa cu nos no ta bay impone riba e pueblo tur sorto di belasting y medida, y nos a cumpli. No tabata y ainda no ta facil,

pero nos ta logra si,” segun de Meza.

E Minister a menciona varios di e proyectonan cu a keda cla, ta andando ainda of ta bay cuminsa na San Nicolas. Nan ta cubri e area for di Essoville te na Pos Chikito. Segun e mandatario, den apenas tres aña y mey, a logra hopi meta y obhetivo y tin hopi mas pendiente. E exito di e gobierno aki su trabounan, ta duna credito na e liderazgo di Prome Minister Mike Eman. “Ora bo tin un capitán manera nos Prome Minister, bo sa cu bo ta yega na un bon direccion. E ta stima San Nicolas mescos cu nos tur ta stima San Nicolas,” de Meza a bisa.

De Meza hunto cu Prome Minister Eman y Minister di Infraestructura Benny Sevinger a pasa e switch cu a ilumina e edificio di Watertoren y ilustra con San Nicolas ta ‘Standing Tall.’ Sevinger y Eman di nan banda a duna tur elogio na Minister Mike de Meza, kende como Minister di Finanzas ta percura pa tin e fondonan disponibel pa asina e proyectonan por wordo ehecuta. □